

**EKALESIA FAAPOTOPOTOGA KERISIANO I AMERIKA SAMOA  
OFISA O A'OA'OGA KERISIANO**



**Tusi mo  
Mafutaga Autalavou**



**AUKUSO – TESEMA**

**2021**

**TUSI AUTALAVOU: AUKUSO – TESEMA 2021**  
**FA’ASOLOGA O MATAUPU O LE TUSI**

- | <b><u>ASO/MASINA</u></b>   | <b><u>MATAUPU</u></b>  | <b><u>TUSI FAITAU</u></b>       |
|--|--|---------------------------------|
| 1. Aukuso 08, 2021   | <b>Su’esu’ega i le Tusi Paia</b>   | II Tupu 5:1 – 14                |
|  | “Aua e te gugu, ae talai ma taulala pea I le faamaoni o le Atua”                             |                                 |
| 2. Aukuso 15, 2021   | <b>Fa’atalatalanoaga</b>   |                                 |
|  | “Tulaga o Tupulaga Talavou ma Suiga Fou”   |                                 |
| 3. Aukuso 22, 2021   | <b>Fa’atalatalanoaga Fa’aaau.</b>  |                                 |
|  | “Tulaga o Tupulaga Talavou ma Suioga Fou”  |                                 |
| 4. Aukuso 29, 2021   | <b>Fesili ma Tali: -</b>   | “Fiafia e faitau lau Tusi Paia” |
| 5. Setema 05, 2021   | <b>Su’esu’ega i Tusi Paia (Aso Sa Talalelei)</b>   | Eseta 4:1 – 17                  |
|  | O Eseta o aso nei: “Ua avea le ola ma faamanuiaga, ma mea faigaluega mo le manuia o tagata.” |                                 |
| 6. Setema 12, 2021   | <b>Su’esu’ega i le Tusi Paia</b>   | I Samuelu 15:13 – 28            |
|  | “E sili le usitai i lo le taulaga”   |                                 |
| 7. Setema 19, 2021   | <b>Su’esu’ega i le Tusi Paia</b>   | Fa’amasino 13:1 – 16:31         |
|  | “Fa’atupu fa’alavelave ona ua lē usita’i i le Atua”  |                                 |
| 8. Setema 26, 2021   | <b>Fesili ma Tali:-</b>  | “Fiafia e faitau lau Tusi Paia” |
| <b>9. Oketopa 03, 2021 – O ketopa 24, 2021 Malologa mo le Lotu Tamaiti</b> |  |                                 |
| 10. Novema 07, 2021  | <b>Su’esu’ega i le Tusi Paia</b>   | II Samuelu – 15&18              |
|  | “ ‘Alo’alo ‘ese i fouvalega auā e i’u vale   |                                 |
| 11. Novema 14, 2021  | <b>Aganu’u.</b> “Sa faitau taimi a Samoa i le oso ae o le la ma goto ifo”                    |                                 |
| 12. Novema – 21, 2021  | <b>Su’esu’ega i le Tusi Paia: -</b> “Faigamalo ma Tupulaga Talavou”                          |                                 |
| 13. Novema – 28, 2021  | <b>Su’esu’ega I le Tusi Paia: -</b>  | Ruta 1: 1 – 22.                 |
|  | “Se alofa ina a tele”  |                                 |
| 14. Tesema 02, 2021  | <b>Fesili ma Tali: -</b>   | “Fiafia e faitau lau Tusi Paia” |
| 15. Tesema 12, 2021  | <b>Tapenaga mo le kerisimasi ma Tausaga fou</b>  |                                 |
| 16. Tesema 19, 2021 – Ianuari 29, 2022.                                    | <b>Manuia le Kerisimasi ma le Tausaga Fou.</b>   |                                 |

## **ASO SA: AUKUSO 08, 2021 – “SU’ESU’EGA I LE TUSI PA’IA”**

### **MATAUPU: “AUA E TE GŪGŪ, AE TALA’I MA TAUTALA PEA I LE FA’AMAONI O LE ATUA” TUSI FAITAU: II TUPU 5: 1 – 14.**

**SINI:** “Ia a’oa’oina mafaufau o tupulaga ina ia mafai ona lototetele e tala’i pea ma tautatala i le fa’amaoni o le Atua. Ae lē gata i lea, a ia loto maulalo e tautatala ai i filifiliga ma fa’ai’uga sa’o, ae aua le gūgū ai, ina ia atagia le amiotonu ma le fa’amaoni o le Atua i le soifuaga o tagata.”

#### **FESOASOANI MO MATAUPU.**

Tasi lenei tala ofoofogia i le Feagaiga Tuai, o le tala i le teine talavou, o ia o le pologa, o ia foi o le auauna, peita’i, tatou te ofo i le fa’aaogaina o lenei talavou e le Atua, na lē gūgū ai pe fefe e tautala ma fa’ailoa atu le mana o le Atua silisili – ‘ese, i lona matai tama’ita’i, (o le avā lea a Na’amanu), i le malomaloā ai o le ma’i lepela o Na’amanu. “Se anoa, ana i ai lo’u Alii i le perofeta o i Samaria, po ua fa’ate’aina e ia o lona lepela”(f: 3)

O Na’amanu, o le alii e pule i ‘au a le tupu o Suria. O le tagata aoga i le tupu, auā o ia na o’o mai ai le manuia mai le Alii i Suria. O le toa malosi toe tāua i le tupu ma alofagia, peita’i, o ia o le tagata na maua i le ma’i lepela.

E manino lelei le tala, na matuā gatete le tupu o Isaraelu, ina ua ia faitauina le tusi a le tupu o Suria. O upu o le tusi na tuia ai le loto o le tupu o Isaraelu, o lo’o i le fuaiupu e 6. “... A o’o atu lena tusi iā te oe, e te silafia ai ua ou ‘auina atu iā te oe o la’u auauna o Na’amanu, ina ia e fa’ate’a iā te ia i lona lepela. Ua ia faitau ona tuia lea o lona loto ma saei ona ofu, ma fa’apea ane, “O a’u ea o le Atua e fasioti ma fa’aola, ua auina mai ai e lenā tagata iā te a’u, e fa’ate’a se tagata i lona lepela? O ana toe upu i le fuaiupu lava e 7, e foliga mai ai o le popole ma le fefe o le tupu o Isaraeleu iā Suria, fai lava o setaua lea ua tapena mai e Suria. Peita’i, o ala o le Atua e lē o ala ia o le tagata, o manatu foi o le Atua e lē o manatu ia o le tagata. Auā ua saunia lava e le Atua le fa’aolataga ma le malologa mo ona tagata, e talitonu ma fa’atuatua iā te ia.

Ina ua lagona e le perofeta o Elisaia le mea ua tupu i le tupu o Isaraelu, ona ia fa’apea atu lea, “Se ā ea le mea ua e saeia ai ou ofu? Ia sau lava ia iā te a’u, ona iloa ai lea e ia, o lo’o iā Isaraelu le perofeta. Na o’o ane Na’amanu i luma o le fale o Elisaia, na to’amalie Elisaia ma avatu le fa’atonuga iā Na’amanu ua fa’apea atu, Inā alu ia, inā ta’ele fa’afitu i le Ioritana, ona toe foi mai ai lea o lou tino tuai iā te oe. Ona e mamā ai lea”

Peita’i, na ita Na’amanu i lea fa’atonuga, ona e ‘ese le fa’amalōlōga na manatu i ai Na’amanu e tatau ona fai iā te ia. (ff: 11 – 12). Fai mai ua liliu o ia ma alu ‘ese. Ae ua tatou iloa foi i’inei le tāua o le manatu o lo’o fa’amamafa i le tatou mataupu, aua le gūgū i le fa’ailoa atu o le fa’aolataga a le Alii. Masalo ana leai auauna a Na’amanu semanū e lē ita lava ma lē faia le fa’atonuga a le perofeta a le Atua, semanū a e lē malōlō foi o ia. “Sema e, ana fai atu e le perofeta se mea tele iā te oe, e te lē faia ea? A’o lenei, e te lē faia ea ina ua ia fai atu iā te oe, E te ta’ele, E te mamā ai.? (f: 13). Seanoa pe ana gūgū pea auauna a Na’amanu, semanū e misi le fa’amalōlōga a le Atua, na ala mai i le perofeta o Elisaia, a’o le tu’alalo a ia auauna na malie ai le ita o le ta’ita’i – ‘au, ae alu ane ma ta’ele i le vaiafe, ona toe foi ane lea o lona tino fa’apei o se tamaitiiti, ua mamā foi o ia. E moni lava, e galulue mea uma mo le lelei o i latou e fa’atuatua i le Atua.

#### **FA’ATINOGA O LE MATAUPU: Fesili e felafolafoa’i ai.**

1. E ta’atele foi i tagata le lagona lea na o’o iā Na’amanu ina ua fa’atonu atu e le perofeta a le Atua, e alu e ta’ele fa’afitu i le Ioritana, Fa’amata o le ā le mafua’aga?

2. Fa'amata o le ā se lagona o le teine talavou lea na fai ma auauna a le to'alua o Na'amanu, na lē gūgū ai e ta'u atu le fa'aolataga a le Atua o lo'o i Isaraelu, a'o ia foi o le pologa i Suria?
3. E le'i gūgū le teine talavou lea e fa'ailoa ona lagona i lona matai, e le'i gūgū foi auauna a Na'amanu i le fautuaina o lo latou ta'ita'i 'au po'o lo latou matai, e talia le fa'atonuga a Elisaia le perofeta a le Atua.
  - (a). O se uiga lelei lea mo talavou pe leai pe ā fua i le soifuaga o lo tatou atunu'u ma lana aganu'u?
  - (e). Ae fa'amata o ā ni mea ua outou silafia o lo'o gūgū ai le tele o tagata, aemaise lava o tupulaga talavou I nei aso?
  - (i). Ae o ā la ni mafua'aga?

### **O nai lagona fa'atupu manatu i fesili o lo'o i luga.**

1. Masalo o le pogai po'o le mafua'aga na ita ai Na'amanu, o le loto fefete ma le fa'amaualuga, ma le manatu ua na o ia lava e sili. Auā na manatu Na'amanu o ia o le tagata mamalu ma aloaia, o ia o le tagata maualuga auā o le ta'ita'i – 'au. Sa tatau foi la i le perofeta o Elisaia ona tala a'ao ane i fafo e faia se togafitiga lelei ma aloaia mo ia, nai lo le fa'atonu atu e lana auauna e alu e ta'ele fa'afitu i le Ioritana. (silasila toto'a i le fuaiupu e (11 – 12). Peita'i ua iloa nei e Na'amanu, o le loto maualalo ma le usiusita'i, ua toe malosi ma fa'amamāina ai.
2. E le'i popole pe fefe i lona tulaga o lo o i ai i le maota o Na'amanu ma le malō o Suria. A ua ia lagona le alofa iā Na'amanu ma ia iloa le malōlōga moni mo ia i lona ma'i. O lona fa'atuatuga ma lona talitonuga, e lē fa'apito le alofa o le Atua i so'o se tagata, o lanu ma gagana uma.
3. O se uiga lelei tele lea mo tama ma teine talavou, le aua le gūgū i mea sa'o ma le amiotonu e o'o atu ai le manuia mo isi tagata. O le gūgū i le mea sa'o o le agasala lea. O le tagata foi e iloa le mea e tatau ona fai, ae lē faia, o le agasala lava lea. O nei aso, o lo'o iloa lava e nisi o matua uiga lē lelei o fanau o lo'o faia, ae pei ua fefefe e fai i fanau ma aoa'i i latou. O lo'o iloa lelei foi e fanau le fa'aletonu o matua, ae ua lē mafai foi ona lototetele e fautua i matua. Ua gūgū foi tagata o aiga ona o pulega a matai, ae ua leai lava se leo e fa'aleoina. Ua lē gagana foi ma gūgū tagata o le Ekalesia ma le malō i ta'ita'iga a isi, ae ufiufi lava, auā e tofu lava le tagata ia ma si ona fa'aletonu.

### **AVANOA MO TUPULAGA TALAVOU E FA'ASOA AI O LATOU LAGONA.**

O le maga (e) ma le maga (i) o le fesili lona tolu, ua fa'apitoa lava lea mo a'oa'oga tāua mo tupulaga, e ala i la latou fa'asoa ane o ia manatu i o latou lava lagona, aemaise lava o ni mafua'aga ua latou silafia, ua afua ai le gūgū o tagata e fa'ailoa ma ta'u atu pea le mea sa'o ma le amiotonu.

O le vaega mulimuli o le fesili e 2, o lo'o ta'oto ai le lu'i mo i latou i le va o le aganu'u ma tupulaga i le soifuaga o Samoa.

Fa'amolemole lau Susuga i le ta'ita'i, ina ia fa'alautele pea le mataupu ma fa'amalamalama i tupulaga, e tusa ai o si fesoasoani vaivai ua tu'uina atu mai le tala.

**TOE MANATU:** Fa'amata e lē o le isi lea mafua'aga o le tele o le pule i le ola o tupulaga ona ua to'atele le 'au gūgū e fa'ailoa le amiotonu ma fa'ailoa o latou manatu ma lagona, ona o lagona e pei ona maua ai Na'amanu. E taotaomia e le fefe ma le popole ne'i iloa le amiolētonu ae lē fa'amamāina ai. Ae ā se fe'au mai si teine talavou Isaraelu, na auauna i Suria i le to'alua o Na'amanu, o ia lenā tupulaga, na ala mai ai manuia iā Na'amanu ma le malō o Suria. Ae ia

manatua tupulaga, ia gūgū i mea sesē ma mea leaga, ae aua le gūgū i le alofa o le Atua ma lana fa'aolataga mo tagata uma.

**PESE:** Tusi Pese #181, e lelei ae pepese ma lagona le uiga o le pese i ona fuaiupu uma.

**TATALO:** Fa'ai'u e le ta'ita'i o le mafutaga i se tatalo.

////////////////////////////////////

**ASO SA – AUKUSO 15, 2021 “FA’ATALATALANOAGA”**

**MATAUPU – “TULAGA O TUPULAGA TALAVOU MA SUIGA FOU”**

**SINI:** “Ia fa’asoa ma fetufa’ai ma tupulaga ina ia mafai ona a’oa’oina ma malamalama i latou ina ia iloa ona ola ma soifua fetu’una’i ma le fa’aeteete tatau i totonu o le gaosā ma le tamāoaiga ua i ai nei i le tatou atunu’u,”

**FA’ATOMUAGA:**

Ua manatu e fai si umi o le mataupu, auā e lē o se mataupu faigofie ona talanoaina, e lē itiiti foi se taimi e au’ili’ili ai manatu ma lagona i le mataupu lenei, ae maise lava pe ā talanoaina mea nei o suiga fou. O le mea lea o le ā vaevaeina ai lenei fa’atalanoaga i ni vaega se lua, e fesoasoani atu ai i le galuega tele o le ā feagai ai ma outou.

1. SUIGA FOU
2. TULAGA O TUPULAGA MA SUIGA FOU.

**FESOASOANI MO LE MATAUPU:**

**(1). SUIGA FOU**

E pei ona ta’ua muamua, e lē faigofie ona fa’atalanoa le mataupu o suiga ona e fai si lavelave ma telē. O le mea foi lea o le ā lē mafai ai ona fa’amatalaina uma le mea nei ua igoa o suiga fou. Ae ua manatu ua na o ni nai manatu fa’avae ia e fesoasoani mo le tatou mataupu.

*O Suiga fou (Social change), o se manatu e fa’amatala gatā. Ae ua fa’auiga e R.HUGO e fa’apea, O le suiga fou, o le suiga lea i totonu o ni vaega fa’atulagaina (social structure) o se fa’alapopotoga o lo’o a’afia ai tagata.” Ou te taofi, ua sa’o lelei lea taofi ma lea uiga o suiga fou iā Amerika Samoa.*

**SILASILA MUAMUA I TOTONU O AIGA –**

(1). I aso la, sa ‘autū mea uma i le ulu o le aiga po’o le matai. A’o le aiga foi, e aofia uma ai le aiga potopoto. Peita’i o aso nei, ua tele ina ulu le ulugali’i lava ia, ua tau fa’alē manaia tele le tāua o matai sa’o o aiga.

(2). Afai ua sui tulaga fa’atulagaina i totonu o aiga, ua sui foi la ma tulaga fa’atulagaina i totonu o nu’u ma alalafaga. Pei o lenei, nisi o suafa matai, ua fa’alagolago le tofiaina o sē e ave ma matai, ona o tulaga lelei i galuega o le malō, o le va i fafo ma lelei le tautala i le gagana peretania. Peita’i, e i ai foi i totonu o nu’u ma alalafaga i latou e lē o ni matai, ae tauāloa tele i latou i totonu o nu’u, ona o ā latou fa’ai’uga fai i ni mea e fai, ona o ō latou tulaga i le malō. Ae o nisi foi o matai tāua i pulega a le nu’u, e lē mau galuega ma tulaga i le malō, e salusalu vao pe teufale foi i galuega e galulue ai, ae to’atele foi nisi o matai fa’avā i pou i le nu’u, o lo’o umia tulaga maualuluga i totonu o le malō.

O se manatu fa’apea e taofi e fa’amatala ai le mea nei o suiga fou (social change) o lo’o fia ta’ua nei. O suiga o tulaga fa’atulagaina (social structure), i totonu o fa’apotopotoga o tagata

(community), po'o atunu'u (society) e pei o Amerika Samoa. Se'i o tatou fa'amatalaina i ni nai upu le mataupu, suiga fou i Amerika Samoa, e fa'atatau i le manatu o lo'o ta'ua i luga. (i.e – suiga o tulaga fa'atulagaina – social structure)

### **So'o se atunu'u ma so'o se malō lava, e fa'atulaga ma fa'avasegaina i tulaga nei:**

1. Fa'apolokiki – Political Structures
2. Tamāoaiga – Economic
3. Olaga masani/lautele – sociala structures.

Ua manatu ai o le ā talanoaina fa'apu'upu'u e fa'ama'ite ai manatu ma lagona, ae o le ā fa'alauteleina i'ina se fetufa'aiga mo tupulaga.

#### **1. TULAGA FA'APOLOKIKI:**

I tulaga fa'apolokiki i aso ua mavae, e aofia ai uma tagata, auā e amata mai i le fono fa'alē –aiga, alu ane ai i le fono fa'alē-nu'u, soso'o ai ma fono fa'a - itumalo, falelima, o Samoa atoa lenā. E aofia ma maua uma tagata i tulaga fa'apolokiki, auā e tāua tele le amataga, o le aiga lea. E fefa'aalia'i manatu o le aiga atoa i lalo o le ta'ita'iga a le matai ma le pulega a le matai. Fa'apenā foi i nu'u ma alalafaga i pulega a matai uma o le nu'u. O mataupu uma e talanoaina, e a'afia ai lava tagata ta'ito'atasi.

O aso nei ua fa'aogā-totonuina (centralized) tulaga o le polokiki i fono fa'a – faipule. E moni e fa'aaogāina foi le fa'aupu e sui e le faipule le itumalō, nu'u ma aiga (representation). Ae a silasila toto'a lava i ai, e lē o taitai ona talafeagai mataupu o lo'o talanoaina i totonu o fono fa'a-faipule, ma le soifuaga o lo'o soifua ai tagata i tua i nu'u ma aiga. O le mafua'aga o mataupu o lo'o talanoaina i fono nei (Legislature), o le fausiaina o le malō, o le latou matāfaii tau'ave lenā. Fa'amolemole laua Susuga a le ta'ita'i se'i fa'apupula pea le uiga o le matāupu, o le fesuia'iga i tulaga fa'apolokiki, ae leai se manatu e fa'ale-aogāina matāfaii pe tete'e foi i ai.

#### **2. TULAGA O LE TAMĀOAIGA:**

Aso anamua, sa mafuli ma lilifa le fa'atulagaina o le tamāoaiga i oloa ('au'afa – ie toga, fala ma isi oloa..), o le ulu o le aiga. A'o manatu fa'avae o lea tamāoaiga fa'a – Samoa, o le aiga (Subsistence economy). O le tufatufaina foi o lea tamāoaiga, e 'autu foi i le matai. E mafua ona pulea e le matai o galuega tau i le tamāoaiga fa'asamoa, ona e pei ona ta'ua, sa ulu mea uma i le matai, a'o le aiga le manatu fa'avae o lona tamāoaiga. O le mea lea sa fai ma tulafono o tupulaga ua mavae (o lo'o soifua ai pea foi nisi i aso nei), le ola fetufaa'i (reciprocity) ma le fefa'asoa'i (sharing).

Aso nei ua va'ai tele i le malosi o le tamāoaiga fa'a - Amerika, po'o le talā (cash economy). E fa nai manatu e lē mafai ona tu'u'eseina mai lenei tamāoaiga ; (1) E tatau ona fa'a'alu ina ia toe maua mai ai se tupu fa'asili. (2) I le fa'aaluina o le tupe e tatau ai ona i ai o nisi tulaga fa'atulagaina (new structures ; e.g – manager, director, salesperson etc..... ) (3) I le fa'a'aluina o le tupe e tatau lava ona fuafuaina lelei (planning ana budgeting) (4) I le fa'asoaina o le tupe, e tele lava ina fa'asoaina e le tagata o lo'o ia mauaina le tupe, o lona uiga, ua lē o se mea faitele, a'o le tagata lava ia (individualistic). O le ā sau maitau i ai tupulaga i lenei vaitau. O fea o taoto tonu ai le tamāoaiga o Amerika Samoa ma lona fa'atulagaina i aso nei? Ua na o se fa'atupu manatu mo i tatou, ae lē o se tete'e.

#### **2. OLAGA MASANI / LAUTELE.**

**Muamua:** O le tele lava o mea e a'afia ai o tatou tagata, o totonu lava o aiga ma nu'u, vaganā ai ua malaga i se isi nu'u, ia po'o ni ta'alogā foi e feiloai ai ma nisi e 'ese mai o tatou aiga ma tagata

o lo tatou nu'u. A'o le olaga masani lea, ua uma lava foi ona i ai i latou e puleaina le fa'atulagaina o ia mea. Sa fai foi ma tulafono masani o lenei olaga masani le manatu ia tutusa uma tagata, o se mea inosia tele le fia sili.

Aso nei, ua va'aia tele le anoanoa'i o fa'afiafiaga ua tatou aga'i i ai. Tele foi o ta'alogā 'ese'ese, fa'alapotopotoga ua tatou auai i ai. O lona uiga ua lē o toe fa'agataina lo latou olaga masani i totonu o aiga ma nu'u, ae ua tatala atu i fafo.

**FA'ATINOAGA O LE MATAUPU:**

1. Fa'amolemole e pule lau Susuga a le ta'ita'i pe vaelua le mafutaga, ia pe talanoa fa'atasi foi e maua uma ai i le taimi e tasi manatu o tupulaga.
2. Ia sa'oloto pea i latou e fa'aali o latou manatu, ae aofa'i mulimuli e lau Susuga i le fa'afeagaiga.
3. Ia aga'i pea le talanoaga i le sini o le matupu fa'amolemole, ma ia manatua pea e lē leaga suiga, ae le o suiga uma foi e lelei. E ao ina malamalama i le fesuia'iga ma le fa'atulagaina'
4. O le vaega muamua lea o le mataupu, ua manatu o le ā fa'aaauau i le Aso Sa o muamua, i le vaega lua, "O LE TULAGA O TUPULAGA TALAVOU I LE LI'O O FESUIA'IGA MA SUIGA FOU"

**Fesili e manatunatu i ai i le vaiaso mo le Aso Sa o muamua,**

O gafea tonu lava o lo'o i ai nei tupulaga talavou i le li'o o nei fesuia'iga ma suiga fou ua tatou i ai?

**Saunia e le Peresetene ni pesepesega e fa'ai'u ai le mafutaga, ma fa'ai'u ai loa i se tatalo.**

**Manuia tele le fetufa'aiga -Fa'aaauau i le Aso Sa oi luma.**

////////////////////////////////////

**ASO SA – AUKUSO 22, 2021. "FA'ATALATALANOAGA FA'AAUAU" MATAUPU – TULAGA O TUPULAGA TALAVOU MA SUIGA FOU" (Vaega Lua)**

**SINI:** Ia malamalama tupulaga e ala i le fa'asoa o manatu ma lagona ina ia mataala i le tele o suiga ua tatou o fa'atasi i le olaga nei, ia iloa ona fa'autauta ma tali atu i ai"

**Fa'atomuaga:**

Malō le onosa'i i lau Susuga a le ta'ita'i ma le mamalu o le mafutaga i ona tulaga fa'alupeina. Ae alo mai o le toe fa'aaauuina lenei o le tatou matāupu e pei ona fa'ata'oto atu ai i le vaiaso ua tuana'i. E i ai foi le talitonuga ua manino ma malamalama le vaega muamua e pei ona talanoaina. Ae o le fesili na tu'uina atu e aga'i i ai se mafaufauga mo i tatou i lenei vaega o le matāupu, O gafea tonu lava o lo'o i ai nei tupulaga i le li'o o nei fesuia'iga ma suiga fou o le olaga u atatou i ai nei?"

**TULAGA O TUPULAGA**

Ua i ai le manatu ua fesiligia nei e tupulaga talavou le tele o mea o lo'o latou fetai'a'i i le olaga o suiga, aemaise lava o mea tuai. Ua a'afia tupulaga talavou i le li'o o fefinaua'iga o suiga fou e foliga e fa'asaga atu i mea tuai o le olaga fa'asamoa, fa'atusatusa i le olaga fiafia ua i ai nei. O se tulaga lea ua utia ai tupulaga i aso nei. O le fa'aletonu, ua aliali mai i tupulaga, e foliga e lē sa'oloto i latou i le soifuaga masani na amata mai ai le Samoa, ae ua atili ai ona fa'asesēina tupulaga i le matagofie o mea fou o aso nei, ma ua manatu ai loa e fulitua i le tāua o le olaga fa'a – samoa. O le upu moni lava la, o tupulaga talavou lea ua sili ona mafatia ma afāina i sāsā (consequences), o nei fefinaua'iga o mea tuai ma mea fou.

O nai fesili ia e tu mai pea i le mafaufau atonu o lo’o fesili ai le tele o tupulaga i aso nei i le feagai ai ma suiga fou. Fa’amata o toe mafai nei ona taofia e tupulaga Samoa le tele o mea t̄ua o le tu ma le aganu’u fa’a - Samoa? O mafai ona toe maua e tupulaga le t̄ua o aiga, lau’ele’ele ma alalafaga? Afai ua i ai nisi o tu ma aganu’u ua l̄ talafeagai ma le vaitau lenei, o ā la ni suiga lelei e sui ai? Lagonaina pea le taumafai o tupulaga ina ia malamalama i mea fou, aemaise ai o le fesiligia pea o i latou pe fa’apefea ona tali atu i suiga fou?

E l̄ fesiligia le galuega tele o lo’o gafa ma le tatou Ekalesia i le aputiputi ma apepele tupulaga e ala i le a’oa’oina ma fa’amalamalama pea a latou sailiiliga o lo’o tauivi ai nei i le va o mea tuai ma mea fou, Peita’i, tatou te l̄ ‘alofia foi le manatu lea, ua matuā l̄ maua’ a o tatou tupulaga i aso nei. E foliga o lo’o latou tutupu ma ola a’e i se tulaga e opeopea ma l̄ mautinoa i le olaga o le tuana’i, le taimi nei ma le lumanai. O le fa’aletonu, ona e tel̄ le femēmēa’i ua o’o i ai, ma ua tele ai foi ina tatou va’aia suiga l̄ malamalama ma nenefu i tupulaga, ua āfaina ai ma le olaga masani sa o tatou tutupu ma ola a’e ai, aemaise lava o le ola o le tupulaga lava ia.

O nisi o fa’afitauli ua alia’e mai i le l̄ mautinoa e tupulaga lo latou tulaga i totonu o suiga, e pei ona tatou talanoaina, ua tutupu ai mea nei. (1). Ua manu’a ai le mafutaga fa’a – aiga a matua ma fanau. (2). Ua malepe ai le maopopo o pule’aga fa’a - matai i totonu o alalafaga. (3). A ua sili ai ona malepe le galuega fa’afaifeau a le Ekalesia i aulotu. E mafai ona fa’amaonia lea manatu i le tele nauā o tupulaga ua liu lotu, ma le anoanoa’i ua l̄ fiafia e lolotu, tupulaga ua latou manatu o le alu i le lotu o se fa’alavelave tele lea mo i latou i o latou sa’olotoga. Ua l̄ mautinoa tupulaga po’o gafea tonu e tutū ai i le finauga o faia nei e i latou i suiga fou ma mea tuai, ma lo latou ola ai i ia suiga.

O le ā se tatou tali e fesoasoani ai i tupulaga l̄ mautinoa o le tatou Ekalesia ma le atunu’u i lea mea? E tatau pea ona fa’ailoa atu, e l̄ leaga suiga fou, ae ia manatu ma mautinoa, e l̄ o suiga fou uma foi e lelei. O le upu e masani ai tatou e fa’apea, e l̄ o mea uma e i’ila o auro ia, auā fa’atoā iloa lava le auro moni ina ua tofotofoina i le afi. E l̄ tatau foi ona tatou tau le pua ma lafo i tupulaga, pe taua’i mai foi e tupulaga a latou pua i matua. Ua tatau ona toto’a la tatou va’ai ma le silasila a tupulaga i le a’oa’oina o mea moni.

Ina ia taumafai e malamalama ma ave’esea le nenefu o tupulaga i ia mea, ou te taofi lava, o le ā fesoasoani mo i latou ma tatou ua matutua, le a’oa’oina o mea moi. E atoatoa le uiga o le a’oa’oina o tupulaga i lo latou tulaga i totonu o suiga, ina ua fa’amatala ma a’oa’oina i latou i mea mo’i o lo’o tutupu i le olaga ona o suiga ua a’afia ai tupulaga. E l̄ tatau foi ona fa’aopeopea i le ‘ea la tatou molimau mo tupulaga, a ia a’oa’o sa’o i latou i lo latou tulaga i suiga i mea moni ma le fa’amaoni o lo’o latou olaina ai le olaga i le taimi nei. E l̄ tatau foi ona tatou gaoia o tatou tupulaga mai i o latou soifuaga masani, i le manatu e fa’alē – agaga i totonu o Autalavou (false Spiritualism).

Ae matuā tatau ona tatou fe’ausi ma a’au fa’atasi ma le tafe o le au o suiga o le olaga. Tatou te malamalama ma lagonaina ai le faigatā o lo’o iso ai tupulaga i lo latou tulaga i totonu o le li’o o suiga e pei ona tatou talanoaina. Ia tatou amata le a’oa’oina o ā tatou tupulaga talavou i mea mo’i o lo’o tutupu i o latou soifuaga. O le fa’amoemoe atoa e fusi ai le a’oa’oga, ia iloa ma mautū i tupulaga talavou le manumalō a’ia’i o Iesu Keriso i le soifuaga atoa o le tama ma le teine talavou, ma tagata uma lava.

## **FA’ATINOGA O LE MATAUPU**

1. Fa’atalanoa pea le mataupu i le faiga masani, e pei o le fa’asoa ma tu’ufesilisili.



2. Afai ae si'i ane e tupulaga ni mau mai le Tusi Paia, ua lelei tele lea, ae fa'amolemole lau Susuga a le ta'ita'i ia fa'amalamalama i tupulaga lona uiga mai le Tusi Paia, ia feso'ota'i ma le matāupu.
3. E manaia ae fa'aaogaina pea le gagana o aso uma e fetufa'ai ai, ma ia mautinoa o mea mo'i o le ā talanoaina i le vaega lea.
4. Ia i'u le mataupu o Aso Sa nei e lua, ua tauluga i le silafia e tupulaga talavou, le manumalō a'ia'i o Iesu Keriso i le soifuaga atoa, tatou te mau tulaga ai i le lē mautinoa i suiga o lo'o tatou ola ai i aso uma.

**FA'AALIGA TAUA:** Fa'amolemole lau Susuga a le ta'ita'i ia matuā fa'amalosi i le Autalavou, le faitauina o le Tusi Fatiau mo le vaiaso fou, ina ia saunia i ai latou, ma maua ai le 'autū moni o le matāupu e pei ona taumafai atu i ai e vavae ai foe o le talatalanoa. Fiafia e faitau lau Tusi Paia. Ma le fa'aaloalo lava.

**Fa'aiu i se pese e filifili ai le Autalavou, ona fa'ai'u lea e le teutupe o le mafutaga i se tatalo.**

**Malō le fa'asoa, fa'amanuia atu le Atua.**

////////////////////////////////////

**ASO SA – AUKUSO 29: “FESILI MA TALI MAI LE TUSI PAIA”**

**MATAUPU – “FIAFIA E FAITAU LAU TUSI PAIA”**

**TUSI FAITAU – II Korinito: 11 - 12**

**SINI:** O se taumafaiga ina ia fa'amamafaina e tupulaga talavou le fiafia e faitau i le Tusi Paia i so'o se taimi, ae le gata i lea ia maumautaia lelei tala o le Tusi Paia i lona gasologa e pei ona tusia ai, a laugaina le tala lea, ae ua i ai le iloa ma le manatua e tupulaga.

**FESILI**

1. O le ā le mea na fefe ai Paulo? (11: 3)
2. O le ā le mea e lē valea ai Paulo? (11:6)
3. O ai na fa'alavaina mea na mativa ai Paulo? (11:9)
4. O ā mea o lo'o sili ai Paulo i lo isi auauna a Keriso? (11:23)
5. O le ā le tala a Paulo, e fa'afia ona o'o le oti iā te ia? (11:23)
6. E fa'afia ona sasaina Paulo e Iutaia? (11:24)
7. E fa'afia ona malaia folauga sa i ai Paulo? (11:25)
8. O ā uma mea semanū a leaga ai Paulo? (11: 26)
9. E ui lava i puapuaga e tele o Paulo, ae o le ā lava le mea e tasi sa matuā mafatia ai i aso fai so'o? (11: 28)
10. Na fa'aapefea ona fa'asaoina Paulo mai Tamaseko? (11: 33)

11. O fea na segia i ai iesu? (12: 4)
12. O le ā le mea matutui i le tino lea na o’o so’o iā Paulo? Aiseā? (12: 7)
13. O le ā le tali a le Atua ina ua ‘aio’i atu Paulo ia ‘ave’ese le mea matutui i lona tino? (12: 8 – 9)
14. O le ā le ta’utinoga a Paulo? (12: 10)
15. O le ā le mea o lo’o tau fa’apupula e Paulo i fuaiupu ia – (12: 11b – 12)  
(Tali: - E tutusa ia ma Aposetolo silisili auā na ia faia fa’ailoga ma vavaga ma mea mamana pei foi o isi.)
16. E fa’afia ona sauni Paulo e malaga i Korinito ae lē taunuu? 12: 14)
17. O ai na ‘auina e Paulo i Korinito? (12: 18)

**FA’ATINOGA O LE MATAUPU.**

1. E i lau Susuga lava a le ta’ita’i le fa’atinoina o le matāupu, i se faiga e ola ma fiafia ai le mafutaga.
2. Pule pea lau Susuga pe fai ‘au, ia pe ‘au lava le tagata ia, e iloa ai sa faitau lana Tusi Paia i le fale.
3. E lē faigofie ona fa’amalosi tupulaga ina ia faitau le tusi faitau i le fale, ma saunia ai mo fesili ua tu’uina atu, ae tatou taumafai pea.
4. O le fa’amamafa lava o le faiga lea, o le fa’amalosi o tupulaga ina ia fa’atulaga lelei o latou taimai e faitau ai i le Tusi Paia, ma iloa tala o le Tusi Paia, ae tu’u ia le fa’auigaina ma le faamatalaina, o le la’asaga mulimuli.
5. E manaia foi se fa’a’ai a le ‘au faia’ina e saga fa’amalosi ai pea le ola tauivi e faitau le Tusi Paia, pe afai e fai ‘au.
6. E lē fautuaina le fa’aaogaina o le Tusi Paia, vaganā ua leai lava se tasi e maua se tali e tu’uina atu, o lona uiga e lē i faitau tupulaga i le Tusi Paia. Ona fa’aaoga loa lea o le Tusi Paia, ma le u’unai malosi ina ia fiafia e faitau e faitau le Tusi Paia.

Pepese leo tetele i le pese a tamaiti, Faitau le Tusi Paia ma Tatalo i aso uma.....

Fa’ai’u e se tamaita’i le mafutaga i se tatalo.

////////////////////////////////////

**ASO SA – SETEMA 05, 2021: “SU’ESU’EGA I LE TUSI PAIA” (Aso Sa o le Talalelei)  
MATAUPU – “O ESETA MO ASO NEI: UA AVEA LE OLA MA FA’AMANUIAGA MA MEA  
FAIGALUEGA MO LE MANUIA O TAGATA”  
TUSI FAITAU – ESETA 4: 1 – 17 (Fa’amamafa fuaiupu : 15 – 17)**

**SINI:** (1). Ia mafai ona lagona e tupulaga le tāua o le fa’aaogā tataua o fa’amanuiaga latou te maua i o latou olaga, mo le manuia mo nisi tagata. (2). Ia malamalama tupulaga i le mea e ta’u o le alofa fa’alē - Atua, a’o le alofa foi e mafai ona fa’atino e le tagata.

## **FESOASOANI MO LE MATAUPU:**

O lo'o manino nisi o uiga ma amioga matagofie a le teine o Eseta, e fai ma lu'itau lelei mo tupulaga i nei vaitaimi. Muamua, o lona fa'aaogaina o ona tulaga aloa'ia ma tau'aloa i auala fa'alē- Atua, ua fai ma auala e fa'aola ai tagata ua fia fa'aolaina. Ua fa'apenā foi ma le meaalofo tāua o le lalelei o lo'o iā Eseta. Ua ia lē fa'aaogaina le lalelei e fa'atupu ai le agasala ma fa'asooso ai i nisi tagata e fai le agasala ma le amioleaga, a ua fa'aaogā e auuuna ai mo le fa'aolaina o tagata. O nisi tamaita'i lalelei, e pau le mea e mafuli i ai o latou olaga, o le fa'aalu o lo latou malosi ma le tamāoaiga e so'ona teu – anoa'i ai ma fia fa'alialia solo. Mo Eseta, O le fa'aaogā sesē lenā o fa'amanuiaga e maua e le tagata.

O le tasi o uiga tāua o Eseta, e pei foi o Ruta, ma Iesu Keriso, o le lē fefe i le oti, ona o le malosi o le alofa i tagata ma le Atua. E lē faigofie le fa'atinoga o le alofa moni, auā e lamatia ai le ola, ma e leai foi se tagata e fia oti mo se isi tagata. Ae ia manatua, o nisi taimi i le olaga, e tofotofoina i tatou e fa'atino le alofa i taimi ma tulaga e ono lamatia ai le ola. Ua iloa i le tala iā Eseta, e le'i oti ina ua solia le tulafono a le malō ona o lona alofa. Ua lu'iina i tatou ina ia lē solomuli i le fa'atinoga o le alofa fa'amaoni. Ia manumalō lo tatou alofa, nai lo tatou fefe vale i mea e ono tutupu. Na oti Iesu ona o lona alofa, ae ona ua finagalo ai le Atua ia o'o le oti iā Iesu. Peita'i, na toetu manumalō, o le talalelei lenā ua tatou sapi ai, o le talalelei i le fa'aolataga na saunia e le Atua mo i tatou ma le lalolagi agasala, ia maua le fa'amagaloina, ma maua le ola e fa'avavau. O le taunu'uga silisili 'ese lenā o le alofa fa'amaoni o le Atua i tagata uma, ina ia lē fano se tasi e fa'atuatau iā te ia. Pe lē o le fe'au 'ea lenā mo i tataou tupulaga i lenei foi Aso fa'amanatuina o le talalelei 2021. Ua mana'omia e le Ekalesia ma le atunu'u aemaise o aiga ma nu'u, ni Eseta lototetele e fa'aaogāina fa'amanuiaga mo le manuia o isi tagata.

**Ia manatua** – Ia a'oa'oina foi tupulaga, e lē o le alofa le malōvale i mea sesē, a'o le alofa moni mo mea lelei e manuia ai tagata, ma vi'ia ai le Atua.

## **FA'ATINOGA O LE MATAUPU:**

1. Ia faitau le mataupu atoa – Eseta 4: 1 – 17
2. Ia fetufaa'i ma le Autalavou i ni manatu lelei e mafai ona maua mai le Tusi Faitau
3. Ia fa'amamafa i le matāupu uiga tāua ia o Eseta o lo'o fa'aalia i le tala –
  - (a). O lona fa'aaogāina o lona tulaga aloa'ia ma tau'aloa ma le mamalu, ma lana meaalofo o le lalelei, e fa'aola ai tagata o lo'o fia fa'aolaina.
  - (e). O le uiga matagofie o Eseta o le leai o se fefe i le oti, pe ā pa'i tumutumu le alofa i tagata o lo'o fia fa'aolaina.

## **A'OA'OGA:**

1. Ia saunia lava e le talavou ia se a'oa'oga tāua ua ia maua i lenei fa'asoa, ma ia taumafai e manatunatu loloto pea i le tāua o lenei Aso Sa o le Talalelei i le fa'aolataga a le Alii, e ala iā Iesu Keriso.

**PESE:** Tusi Pese - #247

Fa'ai'u e se tamaita'i o le Autalavou le mafutaga i se tatalo.

////////////////////////////////////

**ASO SA – SETEMA 12, 2021 “SU'ESU'EGA I LE TUSI PAIA”  
MATAUPU – “E SILI LE USITA'I I LO LE TAULAGA”**

## **TUSI FAITAU – I SAMUELU – 15: 13 – 28.**

**SINI:** Ia totōina pea i loto o tupulaga le moni ma le tāua o lea upu, ae sili ai ona iloa lelei, o le usita'i o se mea suamālie tele lea i lē ana le fa'atonuga, ae sili foi ona suamālie i lē na te fa'ataunu'uina le fa'atonuga. Ia manatua pea ona ta'u i tupulaga, e tāua tele taulaga, ae sili atu ona tāua le usita'i.

### **FESOASOANI MO LE TA'ITA'I:**

O Samuelu, o le tama lea na tatalo ai lona tinā o Hana i le Atua, ina ia foa'iina se tama mo ia. O le uiga o le igoa o Samuelu – *“Ua fa'afogaina e le Atua”*. O ia o le toe fa'amasino o Isaraelu, o le perofeta ma le ositaulaga foi. O ia tonu lea na fa'auu'ina le ulua'i tupu o Isaraeleu, o Saulo lea, ina ua manana'o le nu'u e fai so latou tupu. Sa fa'alagolago Saulo ia Samuelu i le tele o mea na tutupu inā ona po. O Samuelu foi, o le so'oupu lea i le va o le Atua ma le nu'u.

Na 'auina Saulo e Samuelu e tusa ma le poloaiga a le Atua, ina ia fa'aumatia Amaleka. Peita'i, o lo'o manino ma aliali mai i le tala e le'i fa'apea le manatu ma le lagona o Saulo, ua lē usita'i i le fa'atonuga, a ua fai lava lona loto. O i'inei lava na valo'ia ai e Samuelu le 'ave'eseina o le malō mai iā Saulo, ae tu'uina atu i se tasi e sili i lō ia.

### **FA'ATINOAGA O LE MATAUPU: Su'esue i fesili nei, ma faasoa fa'alaua'itele i ai.**

1. E fa'amaonia fa'apefea le lē usita'i o Saulo i le fa'atonuga na fai atu ai Samuelu?
2. Fa'amata o le ā tonu lava le lagona o Saulo na mafua ai ona ia fa'asoina manu pepeti ma Akako le tupu o Amaleka?
3. O le usita'i ma le fa'aloge e sili i taulaga ma ga'o o mamoe po'a. Aiseā?

### **Fesoasoani i fesili e fetufa'ai ai, ae fa'alautele pea e lau Susuga i le ta'ita'i ma le mafutaga.**

1. O le fesili muamua e maua lelei lava le tali i le faitau o le Tusi Paia ma fa'atusatusa fa'atonuga a Samuelu ma mea na fa'asoina e Saulo.
2. O le fesili e lua, e pei e foliga fa'apea se manatu, ua fia fa'alialia Saulo i isi malō, ina ia latou va'ai mai ua alu atu o ia ma vete, atoa ai ma le tupu o Akako o lo'o saisai atu ona lima i tua, o le fa'ailoga ua to'ilalo. Ia e tele pea lagona o le tupulaga, ae tailo i ai iā Saulo ia, ae lelei pea le fa'asoa e malamalama ai talavou.
3. O le fesili tolu, o le tasi lea uiga tumau o Isaraelu i le feagai ai ma le Atua. O le lē usiusita'i, fa'atusatusa foi iā Atamu, Ua fia maua e le Atua ni tagata fa'alogao i lona finagalo ma usita'i i ai, ae lē o le fia faia o latou loto.

### **A'OA'OGA:**

1. Fa'amamafa i tupulaga le afuaaga tele o fa'afitauli iā i latou ina ua fai o latou loto, ae tu'u le fa'atonuga a matua.
2. Ta'u i nai tama ma teine o le Autalavou, o le mea suamālie tele le fa'aloge ma usita'i e fa'ataunu'u le faatonuga, e lē gata e fiafia ai lē ona le fa'atonuga, ae sili atu ona fiafia ma manuia ai lē na te fa'ataunu'uina.
3. Ia ta'u i tupulaga le leaga o le lē usita'i, e leaga le fai loto, e toe salamo ane lava ua masa'a le ipu vai, e leai se mātua e fa'atonu se afafine po'o se atalii ina ia leaga, a'o le taimi e lē usita'i ai e tutupu ai puapuagā i le olaga o fanau. O le lē usitai i mātua o le lē usita'i lava lea i le Atua, auā o i lāua o fanau ola ma tausī ola a le Atua.
4. Fa'aopoopo e lau Susuga nisi a'oa'oga tāua mo tupulaga i le tāua o le usiusita'i.

**PESE** – Saunia se pese mai le Tusi Pese e fa'amausalī ai le matāupu, ona fa'ai'u lea e se alii talavou le aoga i se tatalo.

**ASO SA – SETEMA 19, 2021 “SU’ESU’EGA I LE TUSI PAIA”  
MATAUPU – “FA’ATUPU FA’ALAVELAVE ONA UA LĒ USITA’I I LE ATUA”  
TUSI FAITAU – FA’AMASINO 13: 1 – 16: 31**

**SINI** – Ia fetufa’ai ma le Autalavou ina ia mafai ona fa’atāuaina talitonuga fa’a – Kerisiano i le alofa ma le filemū o le Atua. Ia manino foi tupulaga, a ola fa’atupu fa’alavelave ma fa’asauā, o lona uiga ua lē usita’i i le finagalo o le Atua.

**FESOASOANI MO LE MATAUPU –**

O le fa’a – Naseri (numera 6:2) o se tasi lea o tu anamua e pei foi ona faia e Isaraelu, e vavae’eseina ai se tagata mo le Atua. E ‘ese’ese mafuaaga mo le tautoga fa’a – naseri. E mafai ona ofoina ai sa lā tama a’o le’i fanau mai, e pei o Samasoni. E tauto ai nisi ua gasegase po ua i ai ni ona fa’afitauli. E tauto ai se fafine ua masalomia e lona to’alua ua mulilua, se’i maua le i’uga o le tulaga e pei ona masalomia ai. E tauto fa’a – naseri foi tamaita’i ma pologa pe a fa’atonuina e o latou matai. E ‘ese’ese lava foi le umi e fa’a – naseri ai (6 masina aga’i i le soifuaga atoa). I le vaitaimi o pule’aga a Eleni ma le sauā o Anetioka Epifane, sa tauto ai fa’a – naseri le to’atele o tagata luitaia e tete’e atu ai i ia faiga sauā. E lē o le fa’a – naseri le ola fa’a – monike, e lē fa’asāina foi le faia o se aiga po’o se to’alua. (Not to withdraw from society to a monastic life, and celibacy is not a must)

O tapu ia po’o tulafono e tolu, ia tausia e le fa’a – naseri, e fa’aopoopo i tulafono a Mose.

1. E lē taumafa i se uaina po’o se isi mea e gaosi mai le uaina, e o’o i fua o le vine.
2. E lē o’o le tafi i lona lauulu.
3. E lē pa’i atu i se tino maliu, po’o se manu ua pe (Fa’amasino 14: 8 – 9)

E lē o i ai se fa’amatalaga a le Tusi Paia e uiga i le mafua’aga o le fa’asāina o ia mea, ae e i ai lava ni manatu ma mafauauga e mafai ona feso’ota’i i ai. O le uaina, e mafai ona fa’atusaina i fiafiaga o le lalolagi nei. O le fa’atutupuina o le lauulu, o le tu’uina lea o le malosi uma i le Atua. A uma le taimi o le fa’a – naseri, ona seleina lea ma susunu i le afi o le taulaga (fellowship or peace offering.) (Numera 6: 18), ae lē o le afi o taulaga mu. O le lē pa’i i se tino maliu e fa’amamafa ai le fa’amamafa o le va feagai ma le Atua.

O le tala iā Samasoni o se tala iloga. Peita’i, a toe taga’i i ai, e foliga mai o Samasoni o se toa ma se tagata fa’aeaea i lona malō. A va’ai lelei i ai e aunoa ma se fa’aitu’au, e fai lava si mata’utia o faiga a Samasoni. E ui ina o lo’o fa’amatala le tala i se tulaga o lo’o ta’u mai ai le ‘au fa’atasi o le Atua ma Samasoni, ae lē o atagia i fa’atinoga a Samasoni lea tulaga. Aemaise o le filifilia o Samasoni mai lona fanau mai e avea ma naseri a le Atua. O lona loto ita ma le fa’asauā, ua pei ai o se tagata ua tauemua ona o ana mea o lo’o fai. Sa ia sasae le gutu o le leona ona ua tagi ane iā te ia. Aiseā e fa’aali ai lona malosi i ia faiga fa’atauva’a. E lē gata i lea, ae o le tele o taimi e ita ai, na te fasiotia ai tagata Filisitia e to’atele. O se finagalo ‘ea lea o le Atua na te filifilia ai tagata mo lana feau?

O Samasoni sa i ai i vaitaimi o fa’amasino, o se toa na fa’aeaina le nu’u o le Atua e pei ona vala’auina ai e le Atua, ma avea ai ma ana naseri. Peita’i, o le fa’amatalaina e le tusitala o Samasoni, ua faia i se tulaga na te faitioina ai Isaraelu ma lona vala’auina e le Atua e fai ma ona nu’u filifilia. E foliga mai ua fa’amatalaina lena tala e faitio ai iā Isaraelu. O lo’o fa’atonuina ai Isarael i le ‘ese o lona filifilina e le Atua, ae ua maumau le taimi o le ola, o le malosi, ma le alofa o le Atua ia i latou. Ua fa’amauualuga ma fa’asauā ai, ma ua latou lē iloa ai ala o le Atua. Ua fai lava le loto o Isaraelu, ae lē amanaiaina le finagalo o le Atua. Ua lē gata ina lē amio mamā i luma o le Atua, a ua fa’ateteleina lo latou ola sauā. O le sauā e ma’eu lona mata’utia, auā e lē

fa'ailogaina tagata na afāina ai. Lea na atagia i lana gaoioiga mulimuli na maliliu ai fa'atasi ma Filisitia. Ua lē o gatasi lea ma le finagalo alofa o le Atua.

### **FA'ATINOGA O LE MATAUPU –**

1. Fa'amalamalama le uiga o le matāupu ina ia sologa lelei le talanoaga. Ia Iloa e le mafutaga le 'ese'esega o itu nei e lua:
  - (a). Fa'atupu fa'alavelave po'o le sauā (aggressor, trouble maker)
  - (e). Puipui o lou saogalemū po'o se galuega lavea'i (victim, help a victim)
2. Fa'atalatalanoa tupulaga pe latou te iloaina ni tagata fa'atupu fa'alavelave i le talafaasolopito o le lalolagi.
3. Ae pe mafai foi ona latou ta'uina mai ni tagata fa'atupu fa'alaveve o aso nei.
4. Vaevae loa le mafutaga i ni vaega e te silafia e lē nofonofa ai isi ae fa'atino e isi le galuega. Tofu le tagata ma le pepa lapo'a ma se peni (marker). Ia fa'ailoa i vaega ta'itasi le uiga ma tulafono o le fa'a – naseri ina ia fua i ai a latou sailiiliga.
5. Ta'ape i vaega ma faitau le tala a le vaega. Fa'ailoa mai so latou manatu i le tupu'aga ma le olaga o Samasoni e fua i lona avea ma naseri. Ia pei o vaega e tolu ua tu'uina atu:  
(1) Faamasino – 13: 2 – 24 (2). Faamasino – 15: 1 – 15 (3) Faamasino – 16: 1 – 30

### **FESOASOANI MO LE GALUEGA FA'ATINO**

#### **Vaega 1. Fa'amasino 13: 2 – 24**

O le fa'amoemoe o mātua o se aiga, aemaise o le finagalo o le Atua, ia fa'aauau le gafa, ma ia maua pea nisi e fa'aauauina o latou fa'amoemoega. E fa'apenā le tulaga o lo'o atagia mai i lea vaega o le tala. E lē faigofie i mātua le va feagai ai o le tagata ma le Atua. O le ala lea e ao ai ina mata'u i le Atua ma malamalama atili i lona finagalo mo i tatou, ina nei o tatou fai mea tatou te loto i ai ae tu'u le finagalo o le Atua, ia pe fai foi o tatou loto ae tu'ua'i o le finagalo lea o le Atua. O le ala lea o le tauanau e Manoa o lona to'alua ina ia toe aumai le agelu se'i toe fa'amalamalama le finagalo o le Atua e ala i le tama. O lo'o fia faia e Manoa se galuega lelei mo le agelu, auā e lē itiiti le manatu mai o le Atua i lo la aiga fa'atauva'a. Sa matau pea o ia e silisili 'ese le Atua i lona manatu. E tāua le lagona o le tinā, auā ua ia lagona le pa'i mai o le mafanafana o le alofa o le Atua i lona aiga. Ua fanau Samasoni ma ua tuputupu a'e, o se tama ua fa'amanuiaina e le Atua. O lo'o atagia ai se ulugali'i amio lelei ma le loto maulalo. O lo'o aumai ai le tāua o fa'amoemoega o mātua mo fanau, ina ia savavali i le finagalo o le Atua. E lelei le fa'alagoalago i le Atua, mata'u i le Atua ma sa'ili ina ia faia lona finagalo, auā e fa'amanuia mai ai le Atua i lo tatou ola.

#### **Vaega 2. Fa'amasino 14: 1 – 20**

O le finauga lea o lo'o tautala foi i ai le Aposetolo o Paulo i le Feagaiga Fou, ina ua lē tāua le peritomeina i le tino, a'o le agaga (e pei o le papatisoga a le agaga) E tele ni manatu e mafai ona fua i ai, e pei o nai manatu ia e lua ua tu'uina atu –

1. Fa'ailoga tagata o Manoa. (auā e to'atele foi tagata o nu'u 'ese na fa'aaogaina e le Atua)
2. Popole o Manoa ne'i fulitua Samasoni i lona vala'auina mai le Atua.

O le fa'aiuga a Samasoni, "Ia aumai lea mau, aua e lelei lava ia i lou manatu" o lo'o fesiligia ai, po o lana fa'ai'uga o se fa'ai'uga a Samasoni o le fa'alē - lalolagi, po'o Samasoni le Naseri a le Atua? O le ulufia e le agaga o Samasoni, na ia saeia ai loa le gutu o le leona. E fesiligia po'o o le a le tāua na faia ai e Samasoni lea gaoioiga? O le ā se finagalo o le Atua o lo'o fa'aali mai ai. Ailoga e i ai se tāua, auā ua na o le maumau ai o le ola o si meaola. Ua faia e Samasoni ni tulaga e lē talafeagai ma tapu o le fa'a – naseri. Ua tago i le tino o le manu ua pe. E lē gata i lea, a ua soli le tulafono e lima, ua ia ave ia mea'ai le mamā mai se tulaga le talafeagai ma le soifua maloloina e fafaga ai ona mātua. O le soli lea o le tulafono e lima. O le ā le tāua o le tupua a Samasoni, ua ia to'atama'i ai i tagata na taumateina lana tupua? Atonu e tele ni manatu e tusa ma le tupua a

Samasoni. Ae a va'ai lava i lona avea ma naseri ma fa'atusatusa i lona ita ma lona sauā, e leai se tāua tele o ia mea, aemaise o le uiga o le tupua o lo'o ta'ua ai le suamālie o le meli, ma le malosi o le leona. E foliga mai e fa'atāuaina lava e Samasoni fiafiaga fa'alē - tino, ma le mimita o le tagata i le fa'aaliga o lona malosi, i le ala na ia saeiina ai le gutu o le leona. O lona uiga, afai e leai se isi malosi e sili atu i le leona i le manatu o Samasoni, o lona uiga o ia la le malosi uiga 'ese lea ua i ai. A va'ai i le fa'amoemoe ma le finagalo o le Atua e pei ona amata mai ai le tala, ua lē tusa le fa'a - naseri ma le amio a Samasoni.

### **Vaega 3. Fa'amasino 15: 1 - 15**

Ua fa'aumatia e Samasoni fa'atoaga a Filisitia ma ua ita tele ai Filisitia. Ua latou susunuina ai le aiga o le to'alua o Samasoni. Ona fasia lea e Samasoni o le faitau afe o Filisitia. A va'ai lava i le fa'amoemoe ma le finagalo o le Atua e pei ona amata mai ai le tala, ua lē tusa le fa'a - naseri ma le amio a Samasoni.

### **Vaega 4 Fa'amasino 16: 1 - 30**

Ua leai lava se isi auala e pu'eina ai e Filisitia Samasoni. A'o le fesili, aiseā ua mafai ai pu'eina ma fa'avaivaiina o ia ina ua alu i le fafine talitane i le vanu o Soreka? E talitonu o le ā tele ni manatu o le ā fa'aalia i lea mea. Ae talitonu o le vaivaiga lava lea o Samasoni o lo'o atagia mai i le tala atoa. E lē manatu ifo po'o le ā le finagalo o le Atua ua fai ai ia ma Naseri a le Atua. E lē o tausia e Samasoni tapu o lona avea ma Naseri a le Atua. Na ona i ai o taleni ma le malosi mai le Atua, ae lē o sa'ili i le finagalo o le Atua, e tusa ai ma lona fa'aaogaina. Lea la ua atagia ai se tagata ua tele tigā ma mafatiaga ua ia fa'ao'oina i isi tagata. Ua lē ava i ona mātua ma ua lē tautala sa'o i ona mātua, ae ua silisili ai lona lē usiusita'i i le finagalo o le Atua. A va'ai lava i le fa'amoemoe ma le finagalo o le Atua e pei ona amata mai ai le tala, ua lē tusa le fa'a - naseri ma le amio a Samasoni.

### **Fa'aiuga -**

O le ata lea o le tala e tataua ona atagia mai i le galuega fa'atino. Pe a fua mai le amataga e o'o i le fa'ai'uga, i le tāua o le fa'a - naseri ma gaiouga a tagata oi le tala. E atagia ai le lē tāua iā Samasoni, o le fa'anaunauga sa fa'atāuaina e mātua ma le finagalo o le Atua. Peita'i, ua lē o se fa'amoemoe lelei ua ala ai ona lē fa'atāuaina e Samasoni lona avea ma naseri, a ua fa'atāuaina tele ona fiafiaga ma mitamitaga fa'ale-lalolagi. Atonu o le va'aiga lea a le Tusitala o Fa'amasino, i le fa'alologatā o Isaraelu ma le mimita vale i mea lē aogā, ua galo ai lona filifilia e fai ma nu'u o le Atua.

### **A'O'A'OGA E FA'AMAMAFATA ATILI**

1. Ia mautū i tupulaga lo latou iloa o le tāua o le avea ma Kerisiano. E lē o se mea e mimita vale ai ma fa'aalialia vale ai i le malosi o le tino, auā e o'o ai ina fa'amaualuga.
2. O le avea ma Kerisiano o se avanoa e toe va'ai ai le tagata i lana amio, po'o atagia ai le finagalo o le Atua, e ala i le amio fa'a - kerisiano ma amio fa'a - Iesu Keriso.
3. E lē o le fia malosi ma fai amio matagā ma mea leaga e afāina ai isi tagata, ma ta'uvalea ai fua le suafa o le Alii.
4. Tu'u pea le avanoa e fa'asoa ane ai tupulaga i nisi a'oa'oga e tele mai leni tala.

**PESE** : Tusi Pese #34 Faaiu e le peresetene o le mafutaga i se tatalo.

////////////////////////////////////

**ASO SA – SETEMA 26, 2021 “FESILI MA TALI MAI LE TUSI PAIA”**

**MATAUPU – “FIAFIA E FAITAU LAU TUSI PAIA”**

**TUSI FAITAU – 1 KOFRINITO – 15 – 16.**

**SINI:** Ia fa’amalosi ai le sailiili o tupulaga i le Tusi Paia ma iloa ai tali fesili pe ā fesiligia ai. E tāua tele foi mo le fa’amalosi o le fiafia e faitau le Tusi Paia.

**FESILI:**

1. O ai uma na fa’aali i ai Iesu ina ua toetu mai nai e ua oti? (15: 5 – 7)
2. O ai na mulimuli lava fa’aali i ai Iesu? (15: 8)
3. O ai le aupito itiiti o le ‘au Aposetolo? (15: 9)
4. O le ā le mea e tupu pe ana le toe fa’atuina mai Keriso? (15: 14 – 18)
5. O le ā le mea e o’o i le tagata pe afai e gata i le olaga nei mea ua fa’amoemoe ai iā Keriso? (15: 19)
6. O ai na oti uma ai tagata? (15:22)
7. O ai na fa’aolaina uma ai tagata? (15: 22)
8. O ai le toe fili e fa’aumatia? (15: 26)
9. O le ā le mea e lē tatau lava ona fa’asesēina ai i tatou? (15: 33)
10. O le ā le mea lilo o lo’o tāua i le 15: 51?
11. O le ā le tui o le oti? (15: 56)
12. O le ā le mea na poloa’iina ia faia i Aso Sa muamua o le vaisapati ma lea vaisapati? (16: 2)
13. O fea le taimi na tu’u e Paulo e mata e toe feiloa’i ai ma tagata Korinito? (16: 6)
14. O fea na nofo ai Paulo se’ia o’o i le Penetekoso? (16: 8)
15. O ai le fa’apolopolo i Akaia? (16: 15)
16. Aiseā na fiafia ai Paulo ina ua o’o atu Setefano ma Fotunato ma Akaiko? (16: 17 – 18)
17. O le ā le mea na fa’atonu atu ai Paulo ina ia fealofani ai le ‘au uso i Korinito? (16: 20)
18. O le ā le mea e tatau ona fai i le tagata e lē alofa i le Alii o Iesu Keriso? (16: 22)

**FA’ATINOGA O LE MATAUPU.**

1. E leai se ‘ese’esega o le matāupu lea ma le masina ua tea, ae pule pea lau Susuga a le ta’ita’i, i ni auala e fa’atosina ai tupulaga ia fiafia e faitau tala o le Tusi Paia.
2. E lelei foi ae maua tali ma fesoasoani lau Susuga a le ta’ita’i e fa’amalamalama atili pe fa’alautele atu le tali ina ia taofi mau e tupulaga.



**ASO SA – NOVEMA 07, 2021 “SU’ESU’EGA I LE TUSI PAIA”  
MATAUPU – ‘ALO’ALO ‘ESE I FOUVALEGA AUĀ E I’U VALE”  
TUSI FAITAU – II SAMUELU - 15 & 18.**

**SINI** – Ia a’oa’oina pea le tupulaga i le leaga o le fouvale ma le taupulepule leaga, auā e lē finagalo i ai le Atua.

**FA’ATOMUAGA –**

So’o se fouvalega lava e mafua ma pogai a’e i le loto ua leaga. Ua naunau le loto o lē ua fouvale, ia pei o ia o lē ua fouvale i ai. Atamu na fouvale i le Atua, auā ua fia avea ma Atua. A’o Apisaloma na fouvale i lona tamā, auā ua fia avea ma tupu e pei o lona tamā. O le mafua’aga lea e fouvale ai le tagata, ona o le leaga o le loto, ina ia pei o ia o le tagata ua ia fouvale i ai. E mafai foi ona tatou fa’apea ifo iā i tatou lava, o tatou o tagata fouvale i le Atua, ona ua i ai taimi ua tatou fa’asili pule ai i le finagalo a’oa’o mai o le Atua. E sa’o foi pe ā tatou manatu i tupulaga o aso nei ma fa’afitauli ua o’o mai, o tupulaga fouvale i mātua, ona ua lē usiusita’i i le ta’ita’iga a mātua, auā ua manatu e sesē ma fa’alavelave iā i latou

**FESOASOANI MO LE MATAUPU ‘**

O le mataupu e 15, o lo’o fa’amatalaina ai le amataga o le fouvalega a Apisaloma, na i’u ai ina sola ‘ese ai Tavita mai Ierusalem. O le mataupu e 18, o le taua a ‘au a Apisaloma ma ‘au a Tavita atoa ai ma le oti o Apisaloma.

**FA’ATINOGA O LE MATAUPU –**

1. Ia vaevaeina le mafutaga i vaega e lua ma tu’uina atu i ai ia tofua le vaega ma le mataupu e matuā faitau ma sailiili i ai.
2. Ia su’esu’e ma fa’atulaga le tala i ia mataupu mai le amataga se’ia o’o i le i’uga, ma mea na tutupu ai, ma tagata o lo’o i ai.
3. Afai e mana’omia le mataupu e 16 ma le 17 ona silasila i ai ua lelei tele. A’o le fa’amoemoe ia sailiili ina ia mafai ona manino i le tala atoa.
4. Ia taumafai e soso’o le tala atoa mai le amataga o le fouvalega, se’ia o’o i le i’uga na o’o i ai Apisaloma,
5. Ia tulimataina le gasologa i le va o Tavita ma Apisaloma, o i’ina o le ā maua atoa ai le uiga o se a’oa’oga o le mataupu.
6. Fa’amoemoe o le ā malamalama ma manatua e tupulaga le tala lea pe ā uma ona tu’ufa’atasi i le sailiiliga a tupulaga.
7. Fa’atulaga le tala mai le mea na amata ai le fouvalega se’ia o’o i le i’uga na i’u i ai le tagata fouvale.

**FESILI E FELAFOLAFOA’I AI E FA’ATUPU MANATU MO NI A’OA’OGA AOGĀ.**

1. O ā gaoioiga uma a Apisaloma na faia ina ia taunu’u ai lona fa’amoemoe e tuli’ese lona tamā ae fai o ia ma tupu?
2. E le’i liua le alofa fa’atamā o Tavita iā Apisaloma e ui lava ina leaga le mea na ia faia. (Fa’amaonia mai i ni ana upu ma ni ana aga lenā manatu.)
3. E vale le i’uga o le tagata fouvale, se’i fa’amaonia mai iā Apisaloma ma lona oti.

**Manatu fa’aopoopo –**

1. O fesili uma lava e tolu, e maua lelei lava o latou tali i le faitau ma’ea’ea ma sailiili ma le loto i ai i mataupu o le tusi faitau.
2. E feololo pe ana o se ta’ita’i ‘au lea na fouvale i le tupu, po’o se isi foi ta’ita’i iloga, a’o le fouvale o le atalii i le tamā, o se mea manogi leaga tele lea. Pe lē o le ata foi lea o tatou

ma le va ma le Atua? Fa'alautele ane fa'amolemole si manatu lea i le va o tupulaga ma mātua i nei aso?

3. O le fesili e 2 le fesili tāua, e lelei pe ā tu'uina atu e fa'alautele i ai sa outou felafolafoa'iga ma tupulaga, ina ia latou iloa ma le mautinoa le alofa fa'amaoni o latou mātua iā i latou.

**PESE** – Tusi Pese #73. Fa'ai'u e se tamaita'i o le mafutaga le aoga i se tatalo.

////////////////////////////////////

### **ASO SA – NOVEMA – 14, 2021. “AGANU’U”**

#### **MATAUPU – “SA FAITAU LE TAIMI A SAMOA I LE OSO A'E O LE LA MA LE GOTO IFO”**

**SINI** - E tumau pea le talitonuga ia fa'amanatu ma a'oa'oina pea a tatou tu ma agaifanua ina ia iloa e tupulaga lo latou fa'asinomaga, e ui ina ua suia i ta'aviliga o le laolagi, a ia 'apo'apo pea ina nei mamulu atu ma lē toe iloa.

#### **FA'ATOMUAGA -**

O aso anamua sa leai ni peni ma ni api, o ni mea faitino ia e fa'amaumau ai lea tala ma lea tala ma mea na tutupu. Sa tu'utu'u-gutu ma tu'utu'u taliga mea uma. O le talatalanoa ma le fa'aloge sa teu ai tala a Samoa. Sa leai ni uati e faitau ai lea taimi ma lea taimi, i le fotua'i mai o lea aso ma lea aso. O le oso 'ae o le la sa fuafua i ai mea uma, mai le taeao se'ia o'o i le po.

E leai ni fa'amaumauga po'o ni mea faitino sa mafai ona iloa ai itulā o le aso, e fa'apenā foi i itulā o le po. Afai o le aso fou e amata i le vavala mai o le taeao.

#### **FESOASOANI MO LE MATAUPU –**

O le faitauima e tua'a o taimi i lea aso ma lea aso anamua.

1. Taeao po ----- 4: 00 a.m
2. Ua oso le la ----- 6: 00 a.m
3. Ua maualuga le la ----- 9:00a.m
4. Ua tu tonu le la ----- 12: 00 (aoauli)
5. Ua sipa le la ----- 3: 00 p.m
6. Ua gaga ifo le la ----- 5: 00 p.m
7. Ua pulapula a la goto ----- 6: 00 p.m
8. Ua goto le la ----- 6 : 30 p. m
9. Ua pogisā ----- 7 : 00 p. m
10. Ua tagi 'alisi ----- 6: 30 – 7: 00 p.m
11. Ua ula afi ----- 7: 00 p.m (faigalotu afiafi)
12. Taligā sua ----- 7: 30 p.m
13. Fa'ataoto tōfaga----- 9: 00 p.m
14. Tu lua o po ma ao ----- 12: 00 (Vaeluaga o le po)
15. Vivini moa muamua ----- 11:00 p.m
16. Vivini moa fa'alua ----- 3: 00 a.m
17. Vivini moa fa'atolu ----- 4: 00 – 4: 30a.m
18. Ua oso le fetuao ----- 4: 30a.m
19. Ua tafa ata ----- 5: 00 a.m
20. Ua ao ----- 6:00 a.m

#### **FA'ATINOGA O LE MATAUPU –**

1. Ia fa'atalanoa ma felafoa'i i lenei mataupu pu'upu'u ae ānoa ma tāua.

2. Ia taumafai e fa'amalamalama le uiga o taimi samoa ua tu'uina atu ma fa'atusatusa i le taimi o le uati ua tatou i ai nei.
3. O le vaega tāua foi ia silafia e tupulaga, o gaioioiga a tagata e fa'atino i so'o se aso.
4. E lelei ae fa'amalamalama lelei i tupulaga le uiga o igoa o taimi samoa e pei ona tu'uina atu. Fa'ata'ita'iga: Fa'ata'oto tofaga: o lona uiga ua fofola fala o le aiga o le a momoe i le po). Ua ula afi: o lona uiga ua le toe mumū se afi o gasesega o le afiafi, ua o'o i le taimi o faigalotu i le Atua.
5. Ia manatua, o igoa o taimi ua tu'uina atu, o taimi na sa fa'aaogaina e Samoa, e le'i fa'aaogaina ni fuainumera, ae sa fa'aleo lava i igoa ua tu'uina atu.
6. Ia fa'amanino foi i tupulaga, e lē o taimi uma o le uati e fetau ma le gasologa e pei ona i ai muamua, leai, e lē mafai ona tumau ai.
7. Ia a'oa'oina tupulaga, ia latou iloa e mafai ona lagona i o tatou tino le sa'o o ia taimi i aso ua mavae, pe ā fua i lo tatou ola ai i Samoa. O se meaalofa tāua lea mo o tatou tagata i le faitauga o taimi o le aso.

**IA MANATUA** – O lo'o tumau pea ia taimi po'o fuaitau i le 'au matutua o le atunu'u e lē o suia e o'o mai i le taimi nei. E mamalu pea lava foi le gagana Samoa i lona fa'aaogaina e o'o mai i lenei vaitaimi. E lē taofia ni outou lagona e fa'aali i le mataupu, e tusa o le taumafai atu o le tusitala i le faitauina o taimi ma aso o le atunu'u i aso anamua.

#### **A'OA'OGA –**

1. Ia fa'amamafa pea i tupulaga le tāua o lo latou iloa o meaalofa a le Atua i tua'a o Samoa na faigofie ai lo tatou o'o mai i nei aso.
2. Ia fa'amalosia tupulaga ina ia fiafia e sailiili pea lo tatou fa'asinomaga ma ana tu ma agaifanua, o lo tatou tofi mai le Atua.
3. Ia a'oa'oina lelei tupulaga ina ia alofagia le aganu'u ma le fa'aaloalo a si o tatou atunu'u, **ia taofi mau aua lava nei mamulu.**

**PESE:** “Na tofia e le Atua Samoa ina ia pulea e matai.....’ Fa'aiu i le tatalo a le Alii.

\*\*\*\*\*

#### **ASO SA – NOVEMA 21, 2021 “FA'ATALATALANOAGA”**

#### **MATAUPU – “O FAIGA MALO (o le polokiki) MA TUPULAGA TALAVOU”**

**SINI** - Ia fa'aalia manatu o tupulaga e fausia ai o latou lagona i polokiki ma faigā-malō, ina ia malamalama i latou i a'afiaga o le lumana'i, pei ona iloa i le tele o faigā-malō i nei ona po.

#### **FA'ATOMUAGA – Fesoasoani mo le ta'ita'i - Mataio – 22: 21.**

**“O lenei, o mea a Kaisara, ia ouotu avatu iā Kaisara, a'o mea a le Atua, ia avatu ia i le Atua”**

Ua fa'aalia i'inei (ma isi ana saunoaga) le manatu fiafia ma le fa'aaloalo o Iesu i faigā-malō ma polokiki. E le'i te'ena e Iesu le usita'i i faigā-malō, auā o auala ia e ta'ita'ina ai malō ma tagata. Na silafia lelei e Iesu, o se tasi lea o vaega o le tagata soifua, e lē tatau la ona fa'aleaogina, a ia fa'atāuaina ma fa'aalologia. Na talia ai e Iesu le usita'i o tagata lutaia iā Iesu. Peita'i, e le'i valea ai Iesu. Ia manino ma malamalama lelei tupulaga, e lē gata ai iā Kaisara le usita'i o tagata, auā o Kaisara foi ia, e tatau ona usita'i i le Atua.

Na talia e Iesu a tatou faigā -malō ma tatou pololiki, tatou te auauna ai i le Atua, e ala i le silasila toto'a i mea o lo'o mana'omia e tagata uma, ma ia fua mea uma i le fa'asinoga a le tulafono, e lē gata i le va o le tagata i le tagata, a'o le va ma le silafaga a le Atua. O se agasala tele lo tatou

auaunaina o polokiki ma faigā-malō e foliga ua tatou saili malō ai ma fa’aleagaina ai nisi tagata, ae maise o tupulaga fai mai. I le ma lenei, ina nei o tatou fa’aaogaina polokiki, ma auala ua gata ai iā i tatou le mamalu ma le maualuga, e ou le Atua. O lona leaga, auā e fafa uma i luga o tupulaga le mafatia, auā o i latou ia o le ā sili ona afāina i sasa (consequences) o mea fa’apenei. Afai la na a’oa’oina e Iesu se auala fa’apolokiki e fa’asa’o ai le manatu sesē sa i ai tagata, ua tatau foi la ona tatou onosa’i ma mataala e a’oa’oina tupulaga a le Ekalesia, ina ia malamalama lelei i mea ia, auā le lumana’i manuia o le malō ma ona tagata.

Ia silafia lelei foi e tatou, e lē faia e le Ekalesia ni polokiki mo le malō, peita’i, o lo’o tatou ola ai i totonu o polokiki, auā o tupulaga ma tatou foi, o tagata o le malō. Ae ia manatu foi, e lē mafai, lē mafai, ona tu’u’ese ai le galuega tala’i a le Ekalesia, ina ia maua le amiotonu a le Atua i totonu o faigā- malō po’o polokiki.

E pei ona ta’ua, o tagata o le malō, o tagata foi ia o le Ekalesia. E lē mafai ai ona tatou tu’u ‘ese’eseina, vaganā lava ua tatou talanoaina mea e igoa o agava’a fa’apitoa (specialization), ae lē o le mea tāua lenā i le mataupu o le afiafi.

Ia fa’amamafa pea i lenei fa’atalatalanoaga, le galuega a le Ekalesia o le a’oa’oina o ona tupulaga ina ia latou sauni e ioe pe leai foi, i ia mea, a ua malamalama ma le mautinoa i le lumana’i o le malō, aemaise le Talalelei a le Atua ma lona uiga i le ola o tagata.

#### **FA’ATINOGA O LE MATAUPU –**

1. Ia fa’asoa ma tupulaga i lo latou tāua i totonu o faigā- malō po’o polokiki.
2. Talatalanoa ma fa’asoa i mea nei o polokiki, po’o le sa latou va’ai i ai i nei ona po, e lē gata i lo tatou malō, a o isi malō ma atunu’u.
3. O le ā se manatu o tupulaga o le ā faaalua, fesoasoani lau Susuga a le ta’ita’i e fa’alautele ma fa’amanino fa’amolemole.
4. Ia taumafai lava e sufi tupulaga i ni o latou manatu, pe tatau ona faipolokiki tupulaga po’o le Ekalesia, pe leai?

#### **TOE MANATU –**

O le mea mautinoa lava, e lē mafai ona tatou toe foi i tua, auā o le Atua e galue aga’i i luma. Tatou te lē tete’e atu foi i suiga ma ta’aviliga o mea o le lalolagi, auā o lo’o pulea mea uma e lē na faia mea uma. Peita’i, tatou te ola fa’atasi ma suiga o le lalolagi, auā o tatou o tagata na auina mai i le lalolagi.

Ua ta’ua i luga, e lē fai polokiki le Ekalesia mo le malō, ae ia manatua, o le Ekalesia e tatau ona i ai le fua o le paleni, ina ia atagia i polokiki le amiotonu a le Atua. O le polokiki e galulue mo le manuia o tagata i le tino, a’o le Ekelesia e galulue mo le manuia o le tino mafaufau, ma le agaga. E i ai foi le taofiaga ua masani ai e fa’apea, e lē aiā le lotu po’o le Ekalesia i le polokiki. Ou te manatu ua tatau ona tatou malamalama ma sui lea talitonuga. Ou te taofi, e lē mafai ma e lē tatau foi ona pole mai i taotu le Ekalesia i polokiki a le malō, ae tatou nofonono ma matamata i ai. Leai, e tatau ona tatou fuaina le paleni o mea e tusa ma le finagalo o le Atua, aemaise lava pe afai e afāina ai le soifua ma le ola o tagata i aso fai so’o. Auā o tatou o tagata o lo’o ola fa’atasi ma le polokiki. E lē o le uiga o le manatu, tatou te o’o i le mea o lo’o lote ai le polokiki, leai, o le tatou pito la’au o le fa’apaleni o le fua.

O lona uiga, ua tatau nei ona a’oa’oina a tatou tupulaga, ina ia mataala ma malamalama i polokiki ma faigā-malō. O polokiki lelei, e atagia ai le ola sa’oloto ma le ola fiafia o tagata o se

malō, a’o polokiki leaga, e pologa ma lē tutusa ai tagata uma. Na talia e Iesu polokiki e fa’asa’o ai manatu o tagata, ae le’i valea ai lana tofā ma lona silasila alofa i tagata. Ia manatua, o tagata e matuā afāina tele lo latou ola i le lumana’i pe ā lē paleni le polokiki, o tupulaga, ua tataua ai nei ona a’oa’oina lelei i latou, e fa’avae lava i le Tusi Paia.

### **A’OA’OGA –**

O le ā ta’oto atu ia i se saunoaga fa’ai’u a lau Susuga a le Fa’afeagaiga e aofa’i ai i lagona fa’atupu manatu ua tu’uina atu mo le mataupu, a’o se a’oa’oga tāua mo tupulaga, e tapena ai i latou mo le lumana’i, ina ia malamalama i le gasologa o faigā-malō ma le va ma tupulaga nei ma le lumana’i.

\*\*\*\*\*

### **ASO SA – NOVEMA 28, 2021 “SU’ES’UEGA I LE TUSI PAIA’**

#### **MATAUPU – “SE ALOFA INA A TELE”**

#### **TUSI FAITAU – RUTA 1: 1 – 22**

**SINI:** Ia a’oa’oina atili pea le Aulavou i le alofa lē mavae o le Atua i aso uma ma tupulaga uma, aemaise le tapenapena atu o le ‘au Kerisiano e fa’amanatu le aso soifua o Iesu, o le fa’ailoga ola o le alofa tunoa tele o le Atua i le lalolagi agasala.

#### **FESOASOANI MO LE MATAUPU.**

O Ruta o le fafine Moapi, ua fa’aigoa ai lava lenei tusi i lona igoa. O le tala i le aiga na o e saili manuia ina ua oge tele Petele’ema lo latou nu’u. O le tamā ma le tinā ma le la fanau tama e to’alua. Na fai avā uma tama i fafine Moapi o Ruta ma Orepa. Na maliliu i Moapi tama e to’alua le fanau a Naomi ma Elimeleka. O igoa o tama o Ma’alona ma Kiona. Ona totoe ai lea na o Naomi le tinā o tama, ma avā a ana tama. Ua sauni Naomi le tinā e toe foi i Petele’ema lona nu’u, peita’i ua mana’o foi Ruta ma Orepa latou te o ma ia i Petele’ema. Sa tauanau pea e Naomi nei tamaita’i ina ia nonofo i lo lāua nu’u o Moapi, ae alu na o ia i lona nu’u moni. Na sogi fa’amavae Orepa ona foi lea i lona nu’u, a’o Ruta ua lē mafai o ia ona fa’amavae iā Naomi, ua finau atu pea o ia ina ia la o i Petele’ema le nu’u o Naomi. (faitau i le ta’utinoaga a Ruta na fai iā Naomi, e pei ona i ai i le tusi faitau, e fai ma fatu o le alofa e pei ona ‘autu i ai le mataupu.) O le ma’ea o le ta utinoga lenā ona malie ai lea o Naomi la te o ma Ruta i Petele’ema.

#### **FA’ATINOAGA O LE MATAUPU – IA FETUFA’AI I FESILI IA E TATALA AI LE MATAUPU.**

1. Fa’atusatusa le fuaiupu 1 ma le tali a Naomi i le amataga o le fuaiupu e 21. E te taofi e sa’o le manatu o le lo’omatua?
2. O le ā sou lagona i lea uiga o Naomi? Ua tu’ua’i i le Atua le maliliu o lana tane ma ana tama, aemaise o lona puapuagā? (ff: 19 – 21). Fa’atusa ane la i le fa’aupuga lea ua tatou maua so’o i maliu i Samoa nei, “Tatou malilie ia, e lē o so outou finagalo, po’o so matou loto, a’o le finagalo faito’atasi o le Atua.
3. E i ai se feso’ota’iga o le alofa o Ruta ma le alofa o Iesu na liutino tagata mai ai, ma maliu e fai mo tatou sui?

#### **O nai manatu fesoasoani mo fesili o lo’o i luga, ae talosaga atu e fa’alutele pea i se saunoaga teuteu a lau Susuga i le Fa’afeagaiga.**

1. O le fesili muamua, e pei e foliga e lē moni upu a le lo’omatua e fa’apea, Na ou alu atu o tamāoaiga, ua fa’afo’iina mai ‘au e le Alii, ua mativa. Aiseā, auā na ala ona o i Moapi ona sa oge tele lo latou nu’u, sa o e saili manuia i Moapi.

2. O le fesili e lua, o se uiga ta'atele foi lea i lo tatou atunu'u o Samoa, Tu'ua'i i le Atua se maliu, o le finagalo o le Atua..... Ia fa'asoa pea ma fa'aali lagona o tupulaga i lea fesili le faigofie.
3. O le fesili e tolu, e feso'ota'i i le alofa ua faia mo isi, Ruta mo Naomi, a'o Iesu mo tagata uma. E feso'ota'i foi ia upu i le tautua, . Tautau a Ruta ia Naomi e matua atoatoa ma lelei e le'i foi i tigā ma faigatā, ae sili mamao ai le tautua a Keriso ia i tatou, ona na ia saunia le togioala tele ma le faigatā mo i tatou ma tagata uma lava. Lea ua sauni atu e fa'amanatu lona liutino mai e ala i le pepe o le Kerisimasi, mo le lavea'iina o le lalolagi. Se alofa ina a Tele.

O le ā taoto atu lava ni a'oa'oga o le nei mataupu e fa'aali i ai lagona o tupulaga. Amata loa ona tapenapena mo ni polokalame fuafuaina o le Kerisimasi.

\*\*\*\*\*

### **ASO SA – TESEMA 05, 2021 “FESILI MA TALI MAI LE TUSI PAIA”**

#### **MATAUPU – “FIAFIA E FAITAU LAU TUSI PAIA”**

#### **TUSI FAITAU – MATAIO – 1: 17 – 4: 25.**

**SINI:** Ia avea lenei mataupu o se aula e fa'aosofia ai le fiaifa o tupulaga e faitau le Tusi Paia, ia lē gata i tapuaiga ma aoga a le Autalavou, a ia faapea i le aiga. Ae sili ai ia taofi i tala o le Tusi Paia ma manatua pea e a'oa'oina ai i le soifuaga o lo'o ola ai.

#### **FESILI:**

1. E fia tupulaga mai ia Aperamo e o'o i le Keriso? (1: 17 – 18)
2. O le ā le fa'aaliga ia Iosefa i le miti, a'o tau manatunatu Iosefa e uiga i le to a Maria? (1: 20 – 21)
3. O ā meaalofo a Makoi? (2; 11)
4. Na sosola o le ā Iosefa ma Maria i Aikupito? (2: 13 – 14)
5. O le ā le mea mata'utia na faia e Herota na taunu'u ai le valoaga a Ieremia? (2: 17 – 18)
6. O fea na tala'i ai Ioane? (3:1)
7. O ā upu mamafa a Ioane i Satukaio ma Faresaio na o ane ia te ia? (3: 7 – 10)
8. O ā ni upu a Ioane e iloa ai lona lotomaulalo e fa'afeagai ma Iesu? (3: 11, 14,)
9. O ā ni mea na uiga 'ese ai le papatisoga o Iesu? (3: 16 – 17)
10. O le ā moni lava le galuega a Ioane? (3: 3)
11. E fia fa'aosoosoga o Iesu?
12. O le fa'aosoosoga i le ā le ulua'i fa'aosoosoga? (4: 2 – 4)
13. O le ā le uiga vaivai o tagata lea foi na fa'aosoosoina ai Iesu i luga o le malumalu? (4:5 – 7)

14. O ā uiga to'ilalo o tatou lea foi na fa'aosoosoina ai Iesu i luga o le mauga? (4: 8 – 10)
15. O ā upu na saunoa i ai Iesu ina ua amata ona ia tala'i atu? (4: 17)
16. O ai ulua'i so'o na vala'auina e Iesu? (4; 18 – 19)
17. O ai le fanau a Sepetaio? (4: 21)
18. O le ā lea mea e ta'ua o le sunako? (4: 23)
19. O ai le ulua'i atunu'u 'ese na si'i ma'i ane iā Iesu? (4: 24)
20. O fea na omai ai nei tagata e to'atele na vave ona mulimuli iā Iesu? (4: 25)

### **FA'ATINOGA O LE MATAUPU**

1. Pule pea lau Susuga a le ta'ita'i i le faiga o le mataupu, ae mana'omia lava le faitau ia malamalama ma iloa ona taofi le tala o lo'o faitauina.
2. E fautuaina pea le lava o le taimi e su'esu'e ma faitau ai i mataupu ua tu uina atu.
3. O le fa'amoemoe ia taofia mau tali o nai fesili na ina ia lē toe galo i tupulaga, pe ā o'o ina fesiligia i le lumana'i i lea tala, ae ua iloa lona gasologa e pei ona tusia ai.
4. E lelei foi ae fetufa'ai ma tupulaga pe ā maua le tali sa'o o le fesili, e fa'aleutele ai lo latou iloa ma le manatua gofie o le tala pe ā o'o ina toe fesiligai ai pe fa'alogo ai foi.

Fa'ai'u i se pese e maua lelei ma pepese uma ai. O le failautusi na te fa'ai'uina i se tatalo.

### **Manuia le amataga o le Etiveni**

\*\*\*\*\*

### **ASO SA – TESEMA 12, 2021 “TAPENAGA MO LE KERISIMASI”**

#### **MATAUPU – IA TU'UINA I LE AUTALAVOU LE AVANOA E AMATA AI ONA TAPENA MO NI POLOKALAME MO LE FA'AMANATUINA O LE KERISIMASI.”**

1. Ia amata i le Aso Sa lenei ona talatalanoa le Autalavou i ni tapenaga lelei mo le fa'amanatuina o le Kerisimasi, ma aga'i atu ai i le tausaga fou.
2. Ia fesoasoani i le mafutaga i ni o latou lagona, a ia tu'u pea le fa'atuatauga i ā latou fa'ai'uga ina ia tau lelei le fa'amoemoe.
3. Ia tapena ni fa'atinoga ānoa ua mafai ona a'oa'oina ai i latou, aemaise o lo latou iloa o le tāua o ia aso fa'ailogaina mo talavou, a ia manatua ia fa'avae o latou manatu ma tapenega uma mai le Tusi Paia.
4. Ia fesoasoani i ai ma tapena ma le loto e tasi, ia faia ni tala ma ni pesepesega fa'aleagaga, ma sauniga uma talafeagai mo ia aso.
5. Ia faigofie ma maua gofie e tagata fa'alogologo le fe'au o le ā tapenaina, ma fa'aaogaina.
6. Ia manatua, ua matutua lava i latou, tu'u pea le avanoa e tapena ai i latou, ae aua le tu'ufaua fa'amolemole.

**- FA'AMANUIAGA MO LE KERISIMASI MA LE TAUSAGA FOU -**

Avea ia lenei avanoa, e fai ai ma sui o le ofisa nei, e momoli atu ai fa'amanuiaga iā outou Susuga i Toeaiina ma Faletua, Susuga i Fa'afeagaig ma Faletua, mamalu o Faiaoga Aso Sa, aemaise o fanau ma tupulaga talavou.

Malō le tau, malō le pale, fa'afetai mo galuega lelei uma sa gapātia ai i lenei tausaga o le ā tali mavae. E lē lava upu e fa'afetai ai lo outou agalelei ma le alolofa i fanau ma tupulaga o le Ekalesia, e ala i Ia tatou galuega fa'atino. Fa'afetai le lagolago ma fesoasoani mai, ma ia fa'amanuia tele atu le Atua.

IA MANUIA TELE LE KERISIMASI MA LE TAUSAGA FOU, OLA FOI LE AUFAIGALUEGA I LO TATOU OFISA NEI.

MALO LE GALULUE, MANUIA LE KERISIMASI MA LE TAUSAGA FOU

ASO SA – TESEMA 19, 2021-----IANUARI 23, 2022  
TU'UAGA MO LE KERISIMASI MA LE TAUSAGA FOU

MANUIA TELE LE KERISIMASI MA LE TAUSAGA FOU I AOGA ASO SA MA TUPULAGA TALAVOU  
UMA A LE EKALLESIA I LENEI TAUSAGA.

SOIFUA

////////////////////////////////////